

三水縣志卷之十一

人物傳

忠侃 賢良 宦蹟 儒行 文學  
孝義 潛德 隱逸 武畧附鄉賓耆壽

自來侈人物之盛者必推本於地靈山不在高有  
仙則名水不在深有龍則靈人豈以地重歟實地  
以人重也遐稽宋代以來豪傑挺生於今為烈恭  
遇

朝廷作人雅化超越前代教之以根本而人有孝弟  
忠信之行焉教之以經濟而人有兵農禮樂之選  
焉教之以文章而人有淹雅宏通之譽焉教之以  
風節而人有難進易退之義焉亦足以沾丐其鄉

三水縣志

卷之十一

人物傳

一

使之知所興起也至若取則於鄉復不囿於鄉將  
進之為天下後世人物焉則又存乎其人振拔有  
為耳志人物

忠侃

梁軫 何維栢 李希孔

梁軫號端溪新生鄉人少卓立有經濟志兼精行楷  
書為時推重充肇慶府庠永樂二年選送文淵閣  
與修書籍九年回籍領鄉薦會試不第請入太學  
肄業十二年奉使浙江回京連丁內外艱十七年  
起復宣德三年由國子監除行在山西道監察御

史歷巡浙直陝西等處正統間又巡江西湖廣四  
川雲南等處正統十年劾奏楚藩僭用禮樂忤旨  
回籍當其按山西時有指揮陳抵法托同鄉蘇都  
事餽金視一方明珠五顆求末減軫叱却之按湖  
廣時清法司匿賊贓毫無假貸按雲南時有舊都  
閩當籍沒家貲百萬一內使欲爲之地軫固爭曰  
有一於此是欺罔也內使媿服其剛直類如此故  
謫籍之行咸謂以忌見構云都院王鰲疏薦有凜  
入道之風霜正一朝之綱紀等語軫固辭不出家  
居無擔石儲布衣疏食不異寒士嘗手書孝弟忠  
崇祀本學鄉賢

信勤儉六字刊布鄉間成宏間猶有存者謂之御  
史書生平以貞白自勵遂別號曰貞白萬歷元年  
何維栢字喬仲號古林應初長子也少爲諸生見同  
舍生臨祭而謔輒引避以爲辱已衆嚴憚之常慕  
西樵泉石之勝負笈讀書其中時湛文簡霍文敏  
亦山棲與語多所契合嘉靖辛卯以三禮舉於鄉  
下第復歸西樵讀陳白沙集頓悟陽春養出端倪  
之旨乙未成進士選庶常尋授浙江道御史疏止  
沙河功德二役省費百萬再疏罷征安南師又劾

奏總制毛伯溫奪情非禮責令終制上多嘉納未  
幾謝病歸西樵與劉模王漸遠陳激衷往來論學  
越數年北上訪泰和羅整菴證白沙之學自是日  
益精粹然忠鯁則其天性也出按入閩值歲大禮  
福興漳泉四郡爲甚下車輒發倉廩多所賑卹所  
存活者數十萬人因條救荒策著爲令是時少師  
嚴嵩專柄維栢馳疏奏五事極論嵩罪至比之李  
林甫盧杞起草時大鴉百十噪於亭翼晨復集一  
啄硯池二立公座公祝曰栢志已定縱啄吾目當  
亦不止疏上世廟震怒詔逮之省城內外無老幼

三水縣志

卷之十一

人物傳

三

男婦罔不激切奔泣公籠燈作家書及友札云臨  
事就縛方寸定靜學易以行素乎患難無所悔尤  
生平學問至此頗覺得力云云所過士庶遮道萬  
計緹騎持之益急諸生大哭維栢拱手謝曰此予  
慮定後發人臣之義自當如是生何哭爲閩中矢  
爲歌謠數十百章錄其一二云三水鳳叅天栢窮  
谷深山被恩澤官穀重重賑饑奸弊時時痛革今  
日去民心惻報答無由控訴天但願天心眷忠益  
六月天降嚴霜一栢森然獨挺眼見嚴霜嵩裂  
這栢依然堅勁好廟堂棟梁把乾坤重整栢至京

下錦衣獄法司承嵩風旨拷掠備至逼供尹都諫  
子相桂侍御子榮同黨栢終不變會世廟意寬之  
侯相揣知上旨亦密揭爲解恩發鎮撫司行杖得  
活方栢在閩赴逮及至京就讞也每有綠色小蠅  
數百從之一時咸詫其異故有誠徵錄以傳旣歸  
屏居僧舍聚徒論學務發明白沙宗旨嘗筮得遯  
卦遂以天山名其草堂又擇河南勝地闢天山書  
院以處四方從遊之士如尙書葉夢熊僉憲陳五  
德等皆出其門以勲節著海內云栢雖家食毅然  
以地方爲念如西河改水嘉桂三華諸建置及省  
三水縣志

卷之十一

人物傳

四

會外城之議皆身任之勞怨不卹丁封公憂服除  
隆慶改元首名爲河南道御史未在即超大理左  
少卿尋遷都察院左副都御史協理臺務徐文貞  
階楊襄毅溥雅重之大政多所取決三協大察尋  
內艱還萬厯初徵拜前職轉吏部左右侍郎前後  
請修聖德勤聖學飭羣工諸疏多剴切會少師張  
居正遭父喪奪情衆議保留尙書張瀚私叩之栢  
曰國事一時可支綱常萬古不易不肖疏畱語洩  
見忌出爲南京禮部尙書次潞河遂乞歸角巾野  
服足蹟遍名山其學以白沙無欲之教爲宗一時

名賢大老皆推服或稱其自終日乾乾中來或稱其空洞千古反身一誠又或稱其終身惟一誠大類陳白沙云若以一身扶綱常片言繫九鼎則尤功在社稷也卒年七十七御賜祭葬命主事陳中書胡躬蒞塋事諡端恪從祀郡庠恩賜牌坊會省大市街表曰清朝柱石名世儒宗所著格物慎獨諸語錄易學義禮經辨太極圖解天山存稿及編陳子言行錄傳於世從祀鄉賢仲弟維桐益王府典膳季弟維椅隆慶戊辰進士讀書中秘改授吏科給諫以栢晉內臺總憲辭就春官祠祭司主

政子崇亨廕歷南京都督府經歷

李希孔字子鑄祖白吾有還金厚德父大遇爲柳州衛幕孔生而穎悟八歲能屬文十三補邑弟子員於書無所不讀每求明體達用不爲口耳之學兼好爲古文辭篤於孝友慷慨有大志爲諸生倡建魁岡塔尊經閣九躡棘闈而志益勵越萬歷己酉庚戌年乃聯魁兩榜觀吏部政忽心動告歸歸數日而經歷公卒居喪不飲酒茹葷者三年服闋授中書舍人奉命冊封陝藩悉屏餽遺考選南道御史值遼左經撫失和致悞封疆閱科姚宗文前後

獨擠經略

孔甫拜命卽疏糾之舉其可駭

者二揭其不解者三疏再三上糾其阻抑考選以令旨二字抗言繳還遏抑先帝非常之德一時人心大快咸謂海瑞復出周冢宰嘉謨揚言於屬云近數十年不見如許章疏李侍御氣節稜稜大有擔當人也泰昌元年冬陛辭而南另條陳時務七款以裨熹廟新政明年夏馳疏奏府臣郅輔忠影匿之奸又明年奉京營差因白蓮作尊雷都震鄰疏條四策以戒不虞抵京城有最急七事之陳必期實行諸如諷去沈揆輔漼請逮劉贊畫時俊乞

三水縣志

卷之十一

人物傳

六

正

造書傾陷之罪凡皆侃侃勁槩凜不可

奪而其大者因修萬厯泰昌兩朝實錄巨奸變亂是非疏辨宮闈三大事天子嘉其忠宣付史館又疏請保姆出宮請誅崔文昇皆言人所不敢言者僉壬切齒幾爲主察者所中幸正人相扶得免京營差滿旋差屯馬未拜命而卒於邸舉朝咸惜其大志之未畢也所彙南臺疏草具載家集中從祀鄉賢次弟希孟以恩貢授漳平縣令有善政

賢良

胡 澧

林

鍾

子樑附

李義壯

梁喬幹

孫槐耀書附

蘇 阜

李純仁

鄧 俊

梁鶴鳴

陳開泰

梁允泗

何 翰

胡建偉

胡澧字伯鍾三江人疆力有幹領成化庚子賢書登

宏治癸丑進士授刑部主事遷員外郎以病免正

德庚午起為工部員外遷郎中督治濟寧河道有

功遷知敘州府轉四川松潘副使先是番夷作逆

官兵不能克澧至制神機箭討之箭所及越三百

步人馬遇之莫不焦燬遂焚其營帳積聚一日而

三水縣志

卷之十一

人物傳

七

五寨俱平番人震懼送款督府胡世寧疏其功以

忤柄臣棄官歸都御史吳廷舉疏薦不起嘗遊西

樵山時霍韜以詹事山居素聞澧名倒履迎之因

試澧箭驚以為神與論理學益見稱賞後韜起為

吏部侍郎值大同兵變殺都御史張文錦韜薦澧

併進澧箭詔徵赴京命兵部傳其技擬授僉都御

史開府西北命未下而澧卒澧有才不究於用世

咸惜之祀郡城英德兩學鄉賢

林鍾字太和利瓊人江州照磨林高子也幼慧敏經

史過目成誦領正德己卯鄉舉登嘉靖癸未進士

授浙江西安令持廉奉公勸農興學濯櫛奸胥殲  
除豪猾士振其德民安其業監司屢行旌異或有  
他邑難讞之獄輒委鍾白焉考績北上士民設主  
祀之員外徐璉爲之贊迨遷之日載道遮畱立感  
思碑江山鄭騶稱鍾寬而有立嚴而不虐遇士以  
禮字民以仁而先持之以廉明公恕故獄訟平而  
民不冤租庸減而役不擾誠定評哉轉南刑曹動  
厘欽卹不怵禍福獄有干涉權貴者諸司或跼蹐  
推遜悉以屬鍾鍾一斷以法太宰許讚以鍾廉能  
爲時所推乃特轉民部郎督大同兵餉鍾撫諸叛  
卒咸有經畧尋丁內艱家居三年足不至城邑服  
闋遷安慶守清操愈勵詢民利病與之更始綜理  
大綱不事瑣屑故能自處整暇而百廢具興嘗建  
懷寧學表余忠宣墓旌徐孝子閭皖城風教爲之  
丕振御史錢籍特疏薦之己亥聖母祔郢綜理精  
密梓宮乘潦江行得以利涉而民不苦勞撫按上  
其最有白金文綺之賜以勞瘁卒於官闔邑如喪  
私親生平好吟咏多不存稿有硯山集十卷藏於  
家次子樑嘉靖丙午舉於鄉歷官大冶令有道學  
惠政孫承芳鍾第四子所出登萬曆丙戌進士官



翰林編修以文學見重於世

李義壯字稚大春芳子也胥江人正德庚午舉人嘉靖癸未進士初令仁和政在鋤治豪強矜卹勞獨三年遷戶部主事臨清鈔關以進羨餘七萬受旌改禮部儀制司義壯尙古文詞其時諸郎田汝成王慎中屠應峻悉負僞名而獨嚴事義壯以爲益友歷員外郎出爲廣西督學僉事轉湖廣副使備兵辰沅先是苗人不靖都御史萬鏜以爲憂義壯至督兵直走盧溪急攻其爲梗者以次殲焉諸砦遂望風降附境內以平詔賜白金文綺加俸一級

三水縣志

卷之十一

人物傳

九

歷四川叅政福建按察使革冗弊清吏蠹杜請托縉紳大夫莫敢干以私轉右布政擢僉都御史巡撫貴州時方征苗所規畫多與總制張岳相左遂乞休旣歸有司造請輒不報日簡閱百家之書爲文宏博浩瀚有則詩亦壯麗無卑瑣之態性剛方於人過必嫚罵不能容至砥礪名節者則交懽無忤以故士論歸焉著述最富多散佚所存三洲初稿十五卷行世從祀鄉賢子成性領鄉試第一未仕而卒

梁喬幹字瑤山利瓊人少好學年十五補弟子員嘗

從湛甘泉先生遊以學道自勵不斤斤於章句何  
古林宗伯重其人因迎社於近鄉之瑤山每得社  
中佳文輒跪而讀之曰吾社長也而學不及敢不  
自責應嘉靖丙午歲薦補陽朔訓導尋領粵西乙  
卯鄉書第六名先是場中已定爲元拆號見屬外  
籍遂亞之庚申除福建漳平令時邑城未建值倭  
賊犯境鄰邑多受荼毒喬幹設方畧備禦倭不敢  
犯兩臺竒之行且大用矣以親年老乞致政歸養  
晨昏不離膝下每朔望設聖座率鄉父老講訓六  
規暇則讀書文玩物理而已所著有性理訓釋諸

三水縣志

卷之十一

人物傳

十

子要言等書孫槐力學能文萬厯乙酉歲薦爲浦  
城令多善政以次子耀書貴贈文林郎耀書少穎  
悟補東安學生篤學工苦凡九戰棘闈不遇銘壁  
自砥云讀而弗售我如命何弗售愈讀命如我何  
領萬厯戊午賢書爲諸暨令有聲進階授爵嘗語  
人曰吾蒞暨無他長惟旬日接假命數十詞十無  
一行間得其情亦復質勘再三庶幾不愧於心耳  
尋卒于任

蘇阜字少凝龍池都人都事仲長之孫恭城知縣霑  
露之子也嘉靖戊午舉於鄉中戊辰乙榜署天台

教諭月設五課以誘進士儒諸生張天麟貧無以  
葬阜捐金爲贈池天章長而無室阜助金使娶庚  
午應聘分考滇南遷麗水令蒞任五年興利釐弊  
民用以康鑄石建祠誌遺思焉擢光祿寺正丁艱  
起復補高郵州守兼理河工有成勞例得敘部轉  
官阜時僅五十以倦勤乞致仕家居足不履公庭  
惟讀書訓子歲荒出粟賑助遠近感服子兆亨孫  
澆以諸生入太學

李純仁五頂都天湖鄉人字次堯聰穎一覽成誦十

二歲補邑弟子員明年卽與省試及潮郡王贊襄

者同時號兩神童監試徐按院見而器之命制定  
二小青袍以待發榜並見遺卽以給旌曰下科元  
魁也歸而益所學以需大用耳仁性孝謹凡日用  
所行皆恪遵父訓母陳氏老得健忘病每飲泣禱  
天就養始終勿懈嘉靖戊午舉於鄉初授同安學  
教諭一時人士咸服其教業無有敗羣者遂以不  
開劣報忤姜督學意移教鎮海衛節推唐素知其  
賢檄主五經院事歲甲子聘分楚闈考得士蕭良  
有爲庚辰會榜第一人尋轉楚綏寧令所至有冰  
蘖聲致政家居杜門息囂斷蹟公庭雖經仕宦而

布衣蔬食始終如一時標聖賢微言訓迪諸子雅嗜摩研編削暇時吟哦若有所得蓋安靜樂道任真而行浩浩然也所著有綠野堂集次子士安以萬厯癸巳選貢登庚子賢書選池州石埭縣知縣鄧俊字可籲清塘人少而穎異言動不苟父冷爐公有道君子也深器之爲諸生時學行一時推重以介節自砥嘗客羊城寓提舉廨中有鄰民洗司吏者司官因事窘之搜其藏急將散金一瓿投俊俊爲封識迨得釋悉還之旅館篝燈鄰有少婦素慕俊因取火求合俊正色拒之領嘉靖甲子賢書未

幾丁外艱哀毀骨立三年不內宿署北京慶雲教晉廣西崇善令以櫃金而鞠出同賈之自益因屠刀而辨明貢生之誣殺皆異政也俊性誠但至義所不可則確然難奪有甲科鄉宦爲郡守所庇將引至從祀俊廉得其家食時無行狀峻辭焉土司李天曠父子以嬖貳阻兵相仇者累年諸質訊莫可解者俊受命最後一折柬動之遂爲父子如初饋厚資而將以美姝則一槩屏謝憑祥州與安南爭界俊奉檄往判安人先期遺白金千兩黃金百兩俊笑却之卒據公明界爲立石而旋方其却夷

金也書還刺尾云文定謹持三尺法楊公不受四知金天朝使者堂堂日却笑夷人錯用心及其旋軫也安人亦餞以詩曰天使風流宋廣平冰懷湛湛玉壺清華夷疆界從茲定一路生靈口是銘因爲立却金亭以志盛德焉在崇善三年每日凡事惟盡在我求實際尋陞上石西州守感疾而卒囊金不踰二十蓋廉介之操始終如一也子林楠以選貢爲新淦令

梁鶴鳴字體誠龍池人登萬厯癸酉鄉書再請春官乞恩受閩縣訓視篆羅源政聲大著己卯應聘兩

浙分試轉陽朔令因民賦重酌丈量法以寬之朔民苦於鬻粟以輸稅爲艱鳴許納禾米而爲之轉變請免朔人歲加差馬僕夫及省刑簡訟諸善政一皆出於愛民實心與前賢令鍾昌並稱名杜焉陞判常州偏署劇邑所至去思課最晉戶曹郎奉倉場差有成勞出守潯州潯故僻瘠郡鳴至免勾攝之擾禁毒賴之俗以輕折代浮糧以小艇代馬差篤行鄉約重修學宮皆一時所忽畧者而鳴具舉焉有稅監者虎而翼罪連無辜鳴力雪之并除積棍之爲權爪者卽禍患不卹也武靖夷目拾怨

仇殺鳴鎮撫有方賴以安息考幾滿慨然告致夷民數千暨旗通衢告廟陳請環府衙攀轅不宥散院司委曲勸畱凡五上書稱三宜休十不當畱乃得歸潯人思之卽城隍廟左爲祠祀之後張二守洪典爲之記曰公辛丑去潯潯人以乙巳祠公謂其以真誠之心運平易之政云鳴旣歸築後樂園以老與族黨觴咏爲樂有二疏風傲家禮立族規四方儀之陳文燭吳中行皆謂其自身而家國爲政有本云著有梁氏家規後樂園集從祀鄉賢

陳開泰字侯亮西南街人誠實剛介動履可法登萬

三水縣志

卷之十一

人物傳

古

厯丁酉鄉書有司罕識其面天性孝友丁內外憂皆致哀盡禮遇二弟共爨同財無彼此視焉署廣寧教諭授餐課士篝燈論文泊如也用兩臺薦擢國子助教尋晉南院司務厯官地郎大司徒鄭公方端嚴少許可獨雅重開泰嘗語少司徒畢公曰陳郎中老成廉慎他多不及也每大事必咨焉出守鶴慶歲大禮時方告訕泰憂形于色亟捐俸倡賑於是好義之衆皆感動樂助所存活幾數十萬人郡南北通道八十里達于順州阻山臨壑嶮崎曲折益以泥濘往來者患苦焉泰措千金爲關隘

夷險萬世賴之晉曾作逆震鄰且亟泰厲高士司  
等兵勇往戎行而華裕諸族爲之供億賊望風遠  
遁且問勞抑痛有古恤士體哀貲創復

文廟麗江本府至以千金相助其敬慕有素矣迨持  
憲威清恩威並著苗漢之民歌來暮焉以勞瘁卒  
于官一時諸臺司如失左右手朱少傅燮元臨弔  
極哀曰陳憲使大用未竟且爲地方惜人也崇正  
十一年學道魏檄祀鄉賢

梁允泗字起麟西南街人祖可基以恩選爲閩簿有  
惠政祖叔可至爲瀏陽令廉謹著聲父鐸廣寧庠

生有大節好施賑泗生而敏異博學能文遺才第  
一應秋試充郡學諸生倜儻好義動以古人自期  
萬厯癸卯登賢書第五人公車挫歸惟授徒力學  
屏蹟公門迨謁選署博白教諭博白僻壤也人鮮  
知學至則大設講席迪以彝倫大義四方來學者  
數十百人士習翕然丕變時蒼梧副使作育十一  
學生儒厚幣聘泗使主其教尋遷助教國學都御  
史  
素慕其爲人一見握手若生平遣子就  
學焉出守橫州值歲旱荒郤供億免贖緩凡諸常  
例爲之申革焉剗賊熾泗防禦有方橫賴安枕時

有援黔之師撫按行派里甲米布泗憫民重困不堪追呼捐俸照民價買辦抵解尋以忤勢調簡遂謝病歸裝橐蕭然

何翰號羅峰西南人明萬厯歲薦在庠食廩一字不入官門學以德行首稱初任福建永春儒學廉靜寡慾新進有貧寒者俯慰贈之相勉以學及奉委署縣事兢兢業業非切要公行不敢輕啟堂印時按君考語云古貌古心通縣稱其有學有守縉紳吳載鰲相贈以詩曰美人在粵東珠光照瓊樹美

人在桃源

桃源永春勝名

賞心與我遇鐸振群寐清紫矜

三水縣志

卷之十一

人物傳

六

朱履素藍青相與華冰蘖何所慕縱目天馬峰偃室絕囂暮徵賢重宿成贊襄燦皇路生徒製錦頌揚不輟轉惠州永安教諭諸生迎送載道鐸聲愈振尋陞雷州府教授甫三載辭歸林下陶成後學子孫相繼庠序與友人陳開泰梁允泗同時出仕清聲並著享年八十有九不惟賢良可風蓋一時之氣運亦足紀也

胡建偉字式懋三江人少穎異勵精爲學自號勉亭積勞得咯血病猶攻苦弗輟卒以文學顯乾隆戊午舉於鄉己未聯捷成進士謁選得直隸無極縣



遷正定母喪去官服闋補福鼎鼎爲閩之邊界隣於浙當兩省之衝冠蓋所經輒借民舍棲止不堪其擾前令沿以爲常偉爲築候館居之公私稱便未幾歷永定調閩縣所至以循卓稱有戴乙者竄名司吏頗驕橫因事倨見怒立杖械之一縣讐伏大府益器之署福州糧捕通判權竹崎關廉平稱職薦擢澎湖通判署福州守仍兼通判復護糧驛道時以一身綰三符成就理澎湖爲海中孤島遙隸臺灣士子赴府道試再渡重洋風濤險惡以故人鮮就學

國朝茂才僅三人偉至建文石書院延名師啟迪之詳定歲科二試卽由澎湖考送學院士咸樂之終其任得庠生十三人尋陞漳州南勝同知調臺灣北路理番同知卒於官偉爲人幹練精密遇事輒辦尤嗜古遇公餘卽一卷弗釋歷官南北必載書篋以行故選士有人倫鑒壬午分校閩闈得張中丞岱宗李方伯廓等六人皆知名士所著有澎湖紀畧十二卷江湄集八卷藏於家子珩官至甘肅河州知州有循聲

宦蹟

梁夢卜 周夢龍 梁子豹 霍作明

梁松齡 陸文明 鄧鵬翰 陸蒼霖

梁肇文 鄧純 郭恭

梁夢卜字賚良龍池人崇正八年特典以禮經拔第  
五名選貢任襄陽府判奉撫軍何騰蛟委署漢陽  
府篆時有巨賊踞梗黃安縣亦新破鳩殘黎勤撫  
字有軍功值郡試悉心校閱有張希良者年十三  
善屬文得其卷歎曰奇才也亟拔冠軍未幾成進  
士官翰林侍講學士僉頌知人其強幹廉明楚省

三水縣志

卷之十一

人物傳

六

通志稱其有古良吏風崇祀名宦祠

周夢龍字卜飛康熙癸卯舉于鄉知北直靈壽縣先  
是平湖陸稼書先生嘗宰是邑及龍攝篆新舊令  
尹相得甚歡凡政因革必以告時適龍覽揆之辰  
邑士民爲龍壽且爲之序廉介精白愛民如子循  
聲甚著名父杜母並尸祝之歸講學書院續修邑  
志著有秋水集

梁子豹字不野龍池人康熙癸酉舉人任廣西富川  
縣知縣以恬靜勤謹行政富民俗尙機智多犛蠻  
獠戶踞險號稱難治豹以誠信化之遂變爲禮義

之俗俸滿入覲民豎去思碑以志甘棠遺愛焉

霍作明字良賓董棗人幼聰敏過人康熙癸巳登賢書雍正癸丑成進士授山西汾州府臨縣知縣甫下車卽捐俸修學宮聘名師主義學講席課士論文人才蔚起邑處山陬畏旱禱雨向在三交鎮廟距縣治四十餘里遇旱嘗躬冒烈日徒步虔禱是夕果滂沱立沛臨民頌曰霍公頭上雨嗣又值歲荒卽詳 憲開倉賑濟民無失所又助資糧給牛種民慶盈寧焉慈惠廉明大學士張廷玉贈以廉聲直比玉壺清之句民立祠祀之歸有大學中庸

三水縣志

卷之十一 人物傳

九

兩論講義及梧園稿傳家子學韜例授千總學源教諭孫孔銓孔鉞孔鍾孔釗俱邑庠生孔鈞孔鏞俱國學孔鉦廩生會孫汪湖俱邑庠生

梁松齡岡頭人康熙甲午舉人中乙榜進士授始興教諭銓雲南平彝縣特調定遠縣知縣質性明敏治獄公平百姓歡頌之解組時紳士製袍祖於道陸文明驪坑人幼有神悟未冠補博士弟子員雍正巳酉領鄉薦茗豎穎發門里嘖嘖稱羨爭以杜黃裳器之乾隆壬申以謁選得楚南平江縣甫下車首革徵漕積弊育士課農次第設施皆犁然就緒

方伯周人驥極爲嘉賞會教諭缺員卽命兼攝聽政之餘集諸生至署講論弗輟邑人沐其教文風一變秩滿政成慨然曰田園將蕪可以歸矣遂引疾歸扃戶著書足不踐城市屬奉檄催赴部補官堅辭不往壽終於家其去平邑也士庶涕泣挽之不可爭相餽餞有玉潔冰清德洋恩溥之頌並建生祠祀之

鄧鵬翰號肄江清塘人領乾隆庚辰鄉薦授曲江訓導秩滿銓升江蘇青浦縣爲人醇厚謹飭司鐸時捐俸修祭器月課創給獎賞循循善誘士論翕然

三水縣志

卷之十一

人物傳

三

及宰青浦甫蒞治卽浚淤塞以弭水患青邑漕米向多勢豪包納至悉絕之官斛平收不許浮溢民大悅服通邑有鄧慈父之稱尋署川沙同知亦多惠政汪中丞時督糧儲嘗歎曰鄧令好官慈祥坦直但恐不久任耳逾年果去官歸里

陸蒼霖字昊澤金竹人少負能文名乾隆壬午舉於鄉辛卯恩科成進士授禮部精膳司主事陞祠祭司員外郎兼儀制司事充學政全書館會典館纂修官禮部向有欽給飯食田責佃取租蒼霖憫其租賦稍重請於朝歲減額銀四百餘兩

皇太后升遐以辦理喪儀稱

旨得議敘京察一等由工部寶源局監督遷郎中秩滿  
記名保送御史尋擢廣西右江兵備道官京曹時  
每以不得事二人爲疾及拜監司之

命喜形於色卽請假回籍迎二親至粵西孝養弗衰右  
江道駐柳州西陲諸郡俗多簡陋至則首葺羅池  
祠增柳江書院膏火延名師毅然以培育人才爲  
已任兩權臬篆恤刑慎罰大府咸倚重焉閩省臺  
匪告警奉

旨調廣西兵中丞檄赴黔粵交界之梅寨司地方點送

三水縣志

卷之十一

人物傳

三

官兵出境因感烟瘴差竣卒於官生平以忠孝爲  
大節而根於慈愛觀察六年柳民蒙其賜最多卽  
於柳江書院中爲建祠永祀云

梁肇文字景圖沙頭人乾隆乙酉選拔授興寧教諭  
訓飭士習給赴科者以卷資士感而奮值歲饑捐  
俸倡賑饑民賴以存活者甚眾爲位於文昌宮尸  
祝之秩滿調陵水後以邊俸滿銓陞江西奉新縣  
引見改直隸昌黎邑士力學者多苦無資恒就  
四庫館傭書自給肇文擇其能文者月給膏火以  
資之使卒業復捐俸屬紳士資息爲士子赴科納

卷資邑有淤田數十頃擇親老孤寡及貧士無田者承之其有訟擾公庭者黜勿與抑其公費實其征稅俾經久行之乾隆四十五年

### 上南巡

賞除道能 賜衣一襲紀名候擢用適以母憂回籍哀毀遽卒人多惜其才之未竟云子起雲國學生三子登五子瑄孫光槐光釗俱邑庠生

鄧純字誠中金利三甲人祖雄於財任俠好施與推解弗倦父慷慨亦如之家遂中落純與弟粹安貧讀書次第以科名顯純領乾隆己亥 恩科鄉薦

### 三水縣志

#### 卷之十一

人物傳

三

以知縣畿掣陝西歷署韓城臨潼白水同官麟遊懷遠等縣兩握州篆所至有政聲尤好吟咏暇卽賦詩弗輟韓城王文簡公在都會寄慈惠廉明四字以贈純詩有辱承相國施華袞捧到雙魚切悚惶之句蓋紀實也白蓮教擾川東關中震動純兩解軍饟八川屢犯險阻大府憫其勞檄署臨潼潼故劇邑民逼於匪警率多他徙廬舍幾空純至多方捍衛賊不能犯城賴以全然瀕於危者亦數矣故其紀事詩云義士奮身寧惜死老夫矢志不偷生時論壯之弟粹乾隆戊申舉人官始興教諭子

兆桐嘉慶己卯科舉人

郭恭字翼聖莘村人少穎悟有遠器領乾隆庚子科鄉薦乙卯以知縣籤掣福建視篆莆田補龍巖州州同歷署泉州馬巷通判北路理番同知所至有廉惠聲以調繁署臺灣府嘉義縣事蒞任未久值劇盜竊發相聚爲亂恭卽申請院憲先往勦捕擒其克渠民賴安堵院憲錄其功咨部議敘尋以勞瘁卒於官囊橐蕭然士民助貲歸塋

儒行

張謙光 陸 宣 鄧 任 陳 冕

陸 之 嚴而慊 董 芳 何 顯

郭曰槐 蘇 文 梁文勳 黃大士

董翁中

張謙光胥江人母妊時彩雲集庭除俄而生光奇偉特甚喜曰與吾清河門者必此兒也年將十歲能誦孝經作詩警句及冠躬履純誠潛心洙泗理學精究淵微凡兵刑律歷數術方技釋老外書靡不通究宋紹興閒魁南省第一人時金虜入寇宰相

三水縣志

卷之十一

人物傳

十四

黃潛善汪伯彥用事竊弄威福異已者不誅則竄知光負氣節遣人啖以高爵光曰枉已徇人非吾志也旣而嘆曰漸不可長禍且及天下矣或告之汪黃度其必入庭對日中害之公卽上章引疾歸杜門謝客以書史自娛未幾太學生陳東歐陽澈疏諫二臣懷奸悞國之罪果爲所殺衆莫不服光之先見明哲保身焉卒年六十有三所著濯纓叢稿七卷春秋傳註十卷與夫縉紳士贈遺詩文皆毀于兵燹而其行實載世孫澹圃集中墓在龍坡

山麓



陸宣字汝爲號萬松天分甚高好古力行天順己卯以書經舉鄉貢明年上禮部中乙榜南歸成化丙戌復中乙榜拜保昌儒學署訓導事尋丁內艱起補直隸江陰訓導考績上吏部居最得陟縣令陳情乞附近教職以便祿養授廣西賀縣教諭尋丁外艱起補宿州靈璧教諭凡三厯任卒皆以古道淑人在江陰巡撫牟俸委賑饑行至永陵勸粟拯待哺之急義官曹厚賂求免發其賂于有司後所至活人甚衆故人崔廷珪按治南畿有好僧餽金數百求囑免罪叱之弗顧在靈璧宏治戊申承委

三水縣志

卷之十一

人物傳

五

中都總裁纂修實錄王子應聘江西分試得羅欽順卷力薦第一明年欽順及第時服其知人往來定山元肯相契與白沙先生同時訂道雖間有異同而淵源自合獨厯辨其徒之誤學不仕以其非善學白沙者也皆通論也甲寅乞歸清塘靈芝呈瑞二十餘年詩書自娛尤樂佳山水遇適意處輒品題之其言皆湛涵道德屏蹟不入城市郡禮致鄉賓屢辭不赴建家廟以報先圖族譜以裕後捐貲以葬無告遷竇以弭水灾凡力能義舉者勇爲之其不爲者疾不問巫喪不禮佛親迎不用俗樂

教子弟以身心之學一時曰亨曰聰曰千里曰萬里曰中行皆舉鄉貢曰衍曰百里曰制曰繼芳皆膺歲薦人謂家學所致靈璧張堯輔等舉祀名宦萬曆元年祀本學鄉賢

鄧任字勝之南岸人登成化乙酉賢書屏蹟公門攻苦下帷孝友禮讓之風由身而家內外咸孚嘗度庾闕題張曲江公祠有怪殺祠前多礪石恨無磨斷笑中刀之句寓意深遠過者莫不嘖嘖慨慕云再上春官不遇遂澹宦情卜築麒麟石間爲終隱計陳白沙先生特高其品造訪締交相與講論道

三水縣志

卷之十一

人物傳

三

學如白沙集中所載諏問陰陽諸書皆其晤訂時語也送別白沙有詩云買段南山學種麻肯將根蒂向人誇秋風偶逐龍門客棹轉船頭便到家蓋以論志也及白沙應召北上送行詩云幸際聖朝無事日一封須慰倚門親蓋白沙去就心事任已先得矣壽七十九卒白沙赴焉另拜其墓而爲之

誌

陳冕白泥人少補端州弟子員雅負氣節敦尚詩書從白沙先生講身心之學動遵禮教而修明其義白沙甚器重之及冕卒爲詩弔祭並誌其墓焉

陸之清塘人陸宣之弟澄心理學不逐名利嘗應弟子員試已入選督學欲易之名爲宜之曰君子已孤不更名遂辭不願充歸從陳白沙先生遊多所領悟一時高之

嚴而謙字有嚴鳳岡人茂誠之孫弱冠補邑庠生明末選貢後同選成出就督院李率泰奏授職謙隱於楊梅之沙邊與西樵山人何超之賦詩往還終身不仕詩載沙苑集中

董芳字載之大堀山人邑庠生應標之子少喪父事母孝以國學奉委韶郡教授勤於課士適歲歉督理賑粥捐俸以助全活甚衆康熙丙子丁丑家居賑饑亦如在韶人咸德之生平行誼端方居附城郭非公不至邑令謂其有子羽風焉

何顯字濟善邑庠西南街人教授何翰之子恪守父訓敦篤孝友自少而壯依依膝下田產廬舍隨兩弟擇取毫無難色生平崇尚雅素嘗與友人盧靄卿登翼山吟咏于林下一日飲酒懽甚曰此樂可以忘憂友人曰天下何事最樂何事最憂曰爲善最樂爲惡最憂友人復云欲進于善而去惡則如之何曰忠以宅衷恕以應物而已晚年益高尚自

得南海曾爾璞見之曰古巖穴之士不是過也

郭曰槐字條遠莘村人孝廉曰楫之弟以雍正壬子榜首聯捷成進士乾隆癸亥授浙江松陽縣兼署遂昌甲子充浙闈同考官淡於仕進未久卽解組歸里兩袖清風而已槐自成童卽偕兄曰楫恪遵家訓安貧嗜學其父玉容課子嚴每日必令其兄弟構時藝數首故得題皆能舉筆立就而槐尤工於詩歸里後吟咏自娛有紹衣堂文稿傳家

蘇文字瞻如蓬村人與郭曰槐鄉會同榜成進士回籍候銓一室授徒依然儒素也村前積淤成坦曰

三水縣志

卷之十一

人物傳

五

海心沙民爭承墾歷年不決邑令重文廉介屬爲文業強使名佃陞科族人爭出貲助之文弗能卻旣報承文歸之祖嘗爲通族歲祀之需且備旱潦荒歉嘗曰邑侯盛德文不敢辭亦不敢獨私其利宗人蕃衍可共保之隣里述爲美談後以應選入都卒於旅邸同邑梁進士喬塏集資歸其櫬焉語詳梁傳

梁文勳字輝鼎鄧坑人領乾隆辛酉鄉薦壬戌聯捷乙榜進士選惠來教諭丁艱起改授東安會邑有徵調事新令未至臺司命暫攝縣篆事悉辦以軍

功舉卓異不樂就繁劇引

見後仍請留教職以龍川教諭終勳負宿學志在汲引後進不欲以吏治顯故秉鐸三縣所至得士心而幹濟才亦於攝篆時見一斑矣

黃大士字右文黃山人少魯鈍秉父訓溺苦於學登乾隆丙子賢書父材英以學術佐諸侯治當道爭延致之大士既獲雋會新建裘尹來宰斯邑其尊人曾仕於粵而材英主之者也與大士聚紀羣交延主鳳岡講席深相器重大士擁臯比勤講授非公不至雖至戚密友不敢干以私尹益敬禮之性恬淡不樂仕進通邑重其品公舉鄉飲大賓安貧樂道以壽終

三水縣志

卷之十一

人物傳

五

董翁中字同和大堀山人歲貢生性樸訥篤守古訓不苟言笑丁內外艱倣喪禮行之銜恤三年至性肫肫不假貌飾論者謂能追蹤江子望云課徒鄉塾以正人品爲先務設治心編準一日行事之功過書于冊昏定覆按之期于無憾而後卽安弟子多則傲之居附城恬淡自甘邑令時適其廬每不報易簣之日邑令王元樑深惋惜之輓章有學富由來推子政公餘何處望澹臺之句非虛譽也著

有四書講義經義辨類隴西族譜藏於家子思誠  
嘉慶丁卯科舉人懷道國學生

文學

林承芳 梁爲鵬 鄧莫右 梁喬瓌

周星聚

林承芳字開先鍾之孫也幼穎悟文過目成誦下筆驚人墳典無不究覽工詩文精翰墨中萬曆丙戌會榜廷試奏策纒纒萬言咸有經濟才已定第一人三日因錯一字遂置二甲第一選讀中秘書授翰林院編修當時推服受知神廟命書中極殿額甚嘉賞之尤見重於張王兩相公未幾以名高見妬左遷江西叅議歸怡情山水遇景輒吟詠所著三水縣志

卷之十一

人物傳

三

有文峯集竹窻存稿今士人有得其翰墨者輒如獲寶玩云

梁爲鵬字博斯鄧坑人性穎悟凡周髀巫咸青囊赤霄之術罔不究心探索抉其元奧積學旣富發爲詩文宏博竒麗爲嶺南諸名家所引重康熙戊子舉於鄉庚寅考授內閣中書性剛直膽識尤卓能爲人所不敢爲

朝制禮闈取士酌定進士額合十八省以南北分之湖廣江西福建四川廣東五省合江浙填黔等省爲南卷而論卷取中焉康熙五十一年會試五省鄉

先生欲呈請別於江浙等省以免人多數少偏枯之病繕稿既就以叩閣難其人議久不決鵬毅然身任事

聞得

旨下禮部議乃獲於南卷中復分南左南右以別之當叩閣時大臣叱問抱牘者爲何省人鵬抗聲應對不少屈章遂得達未幾引疾歸邑有富宦欲從祀鄉賢令已徇其請矣府檄邑紳簽名結覆腹黨袒之案幾定鵬聞之憤然曰崇祀大典烏可以財虜冒濫汚我聖賢挺身攻擊卒賴以寢鵬初以叩閣

三水縣志

卷之十一

人物傳

三

得直遠近耳其名至是人益敬憚之居鄉訓子弟敦齒讓樂施與晚年益自歛抑和平坦易尤多長者風焉

子逢年恩貢熙年邑庠孫文輝舉人曾孫太舉元孫瑞元俱貢生

鄧莫右字作聘南岸人學植淹博少年能文章聲滿鬢序邑令樊翰見之許以偉器數竒屢躋棘闈雍正癸卯由恩貢登賢書年已六十矣每一藝出人爭購誦之故其帖括多梓行於世爲諸生時龍巖鄭玟武進徐依先後宰肄耳其名皆訂文字交會舉優行之士右以敦倫篤學預其選學使者陳公手書此四字旌其門焉天性孝友尤方嚴戚黨不



敢干以私授徒於鄉肫肫以敦倫紀崇正學爲士林倡舉族正動必循禮子弟莫不矜式之年六十  
九未仕以孝廉終著有四書貫珠禮記摘釋詩易  
發揮綱鑑論纂古文評註藏於家

梁喬塏號髻麓大岡人以副榜登乾隆甲子賢書乙  
丑聯捷成進士歸銓選將促裝行矣會同邑蘇進  
士文赴銓在都病卒於邸櫬不能歸塏解裝暫畱  
百計經營益以稱貸偕邑孝廉歐陽騰親送回籍  
非以此爲豪舉蓋天性也居恒學有根柢一時俊  
髦多出其門屆選授四川名山縣多惠政廉潔自

好不事奔競秩滿不遷尋卒于官塏原名膺綬應  
童子試府考被黜先是族伯彌振得夢兆以喬塏  
名其子而不慧令其借名補試得入泮秋榜發卽  
中副車因仍其名不復更正後名山人感其德爲  
位配享城隍廟至今弗替云

周星聚字以德黃岡里人醇正風雅行與文稱先達  
見其文許爲作手交譽之益肆力於學造詣日進  
乾隆己卯舉於鄉以謁選知縣任東安教諭仍候  
銓東安隸羅定故小邑俗簡陋星聚秉鐸後文風  
一變州人士多負篋從之嗣赴銓授湖北穀城知

縣自謂乏民社才願仍就教職乃改高要教諭以  
誘掖獎勸得士心廣肇各郡學者咸聞風至數年  
間其彭戴多破壁飛去春秋榜中踵相接也大府  
重其才屬兼端溪書院監院門墻之盛時罕其匹  
宗人府丞龔公驂文予告在籍贈以言有經師人  
師之目年七十卒於官欽州馮太史敏昌爲誌墓  
所著竹里文稿及門南海何守竒梓而行於世

孝義

范奎 陳九韶 梁廷檜 陸滾

梁柱丞 鄧上昊 陸志道 李克孝

陸丕顯 李先春 劉元化 劉應奎

周良能 陳蒙棟 徐麟士 范吳

陸肇泰 梁守拙 陸之隆 鄧廷玉

范奎胥江人遊心性命超然俗外常從陳白沙遊篤

孝行居喪動遵古禮既葬廬墓側哀慕終身

陳九韶白泥人爲邑弟子員孝友著聞內外無間所

有之財悉與兄弟共之銖兩無私叔病疫人皆畏

三水縣志

卷之十一

人物傳

三

避韶周旋臥起甚謹至叔愈乃已生平究心理學

實踐副之嘗顏其所居曰自見窩因號自見子此

有得於聖賢戒欺求慊之旨者也及卒邑令朱端

明以詩輓之曰自見先生今何往盡收正氣上蓬

萊生平不作欺心事沒後清風實可哀

梁廷檜字彥操號東井龍池人少失怙恃父事其伯

兄兄病不解帶寢者逾年兄卒遺呱呱兒乃母事

其嫂子其姪而植立之其從叔蘭徑舉家染疫里

中咸畏避公曰奚必疫能死人哉病爲調理沒爲

殯藏竟無恙生平無自封能救貧乏每揭孝弟忠

信實事訓子子雀鳴旣得雋益以廉節自勵聞鄉之宦者厚貲歸輒掩鼻曰勿令鄰家兒知之故能成其子爲清白吏云年六十八卒贈承德郎常平府判

陸滾金竹人幼孤家貧母鄧氏孀居茹苦滾稍長卽躬耕致養鄧晚年喪明滾亦老然凡飲食櫛沐滾必躬親歷四十餘年孝事未嘗稍懈撫弟淵更友愛出入必偕有薄產弟成立當分滾令弟先自取故當時有滾淵眞兄弟之美生平不與物忤惟日以孝弟訓其子姪族人推爲族正

三水縣志

卷之十一

人物傳

三

梁柱丞龍池人字朝棟九齡失父事母周氏至孝周以三十一孀守歷年八十有九丞侍養順承曲盡其方及周旣耄也飲食寢處多不自知丞每進五味必親調劑陪臥榻側終夜數起抑搔細至蟣虱垢穢躬自滌除不委於妻子母子依戀終身如孺其丁喪也年六十七矣哀至棘酒肉不沾唇枕苦柩左卒哭旣謀葬而後已叔震涯舉家犯疫人皆畏避丞入侍調理卒賴安痊生平處從兄弟無私財曾從族正逢時學舉業不成而終身師其嚴訓不敢一事昧心對族人非祖宗家規不肯曲說老

而益貧喜吟詩自適有自咏松林逸叟及戒子弟無弄巧二作其言類見道者載梁氏家譜中

鄧上昊字鳳翥伏護人儒業不就供事郡椽父樂山在家驟故不及視含遂以爲終天恨謝去功名曰我旣闕子職於生前則求報父親于沒後耳乃立志習堪輿書精究其術求善地葬父而後慰無日不至父柩前撫摩數次歔泣呻吟歲饑貸粟區村鄉中悉焚券不取人甚德之子大用以吏材爲懷

集吏目

陸志道清塘人事父至孝竭力供養每進食必親視

三水縣志

卷之十一

人物傳

三

溫冷之節旦夕不去左右父偶病志道衣不解帶愉婉床几愈而後卽安愛親之誠始終無間父沒哀毀骨立事兩繼母尤得其權值丙申大饑首倡出粟施賑鄉族存活甚衆每訓誡子弟必以孝行爲先

李克孝字寐懷西南人父孟陽客故泗城以遺腹得克孝旣長痛父之永隔而母氏苦貞也遂爲若名若字承順母氏無不周至母梁課督頗嚴克孝亦順受無斃務刻苦自勵以副所期爲名諸生博學能文試輒上列郡守余深器之有遠族李洲賓等

仇扳成獄克孝惻然時適余守東招克孝至省慰其下第意甚殷克孝因得義白之并同案三十餘人俱得釋致謝分文不受但畱一劍識不忘云有母舅高要梁少珍以鹽商卒欽州遺金數百族梁貴在寓逼珍妾李氏輒取之歸復欺珍子預麟在孤幼中透勢占產克孝痛憤無何適高邑長周訓者道經三水夙知克孝文名因會晤間力情代白追金復產且諭貴曰懿親不可失也遂亦悔悟如初克孝食餼三十一載經曾學憲檄獎有二人明發讀蓼莪而可興文學旣著孝行尤昭之語於正

三水縣志

卷之十一

人物傳

三

貢年卒

陸丕顯清塘人天性孝友天啓丙寅父病劇顯叩天願以身代父病轉篤顯潛入密室中割其股肉一臠和藥以進父病尋愈顯抱疴半月亦愈知縣蔣獻竒扁其門曰孝行垂芳

李先春五頂人食餼邑庠潛心太極西銘等篇動遵古禮事嫡母陳氏盡孝居喪三年不近閨闈督學陳署孝行第一與李侍御希孔陳憲副開泰爲敬業友屬疾陳憲副候湯藥及卒李侍御誄文有不緇不躁風來世之句

劉元化鎮南人以孝聞嘗隨父出見有負疾行乞者  
父命恤之召至家調養周歲痊可資遣之鄰近貧  
不克葬者周以錢穀居近河旁有漂溺者救痊之  
每冬月躬率男僕巡視掩埋骼骸不計其數父年  
八十有疽病旦夕扶持親理寢食父曰我有孝子  
汝子當復如是三子衣冠繩繩人以爲孝德之報  
劉應奎號思靜松岡人邑庠性醇謹居父母喪及兩  
繼母喪終制共十二年悉循古訓稱其孝者人言  
不間年三十失配義不再娶博洽經史手著通鑑  
要略縣學交舉孝義督學陳特加獎賞子如蟾邑  
光祚郡庠

三水縣志

卷之十一

人物傳

三

庠長孫漢祚歲薦授廣西柳州府賓州知州次孫  
周良能黃岡里人崇仁之猶子也性至孝事母劉氏  
溫清定省數十年如一日旣沒事之如生每出告  
反面於靈柩前嚙嚙如問答語其天性摯切若此  
少習舉子業博極羣書子史百家無不淹貫然屢  
試輒蹶遂絕口不言仕屏蹟教授生徒著書自娛  
年八十卒所著有囊餘草傳

陳蒙棟字貽昇白坭鄉人明世襲千戶陳大捷五子  
爲人慷慨有大節饒智畧樂排解居鄉懲強抑暴

不少左右袒明末世亂鄉人推爲練總時白旂賊蜂擁剽掠各村驚擾棟與同里徐麟士率鄉勇往來救援殺賊無算遠近賴以保全一時有長城之倚尤敦孝友崇義讓鄉黨賢之子鎮能讀書以童試冠軍入邑庠

徐麟士字簡之白泥人爲邑諸生以氣節自勵明季世亂與同鄉陳蒙棟協力捍衛桑梓賴之

范吳三江人幼慧敏通經史及兵刑律歷等書父東山家法嚴謹尤能將順每侍食必肅容晨昏定省不敢或缺試輒前茅隨入本邑庠 官保傳用兵

三水縣志

卷之十

人物傳

罕

西粵特具弓旌來聘因念早孤母蘇氏年將七十欲辭不就母出宦族素明忠孝大義諭令就聘叅謀恢復梧州心切承權力求閒職 題授懷集教諭到率諸生講學明倫甫數月平定巨寇 官保傅題授懷集縣知縣卽迎母養署中凜遵母訓省刑薄歛母老思歸陳請終養上司僚屬賦詩送行蒼梧蘭道憲詩云功名事業未曾終便爲承懽勇退東一片孝思千古少悠悠芳範五倫中解組歸後菽水承懽依依膝下未三載丁母艱寢苦素食哀毀骨立營塋焦勞成疾服闋未及補用而終知



縣程翔輓詩云先生孝義世所希孺慕從來獨不  
違今日蓋棺公論定芳畱千載有餘輝

陸肇泰字保泰金竹人歲貢生天性懇摯少時事父  
母卽以孝聞父其超邑庠生課子嚴泰秉義方訓  
篤志文行學養兼到親病輒憂形於色衣不解帶  
親歿擗踊欲絕殯塋盡禮廬於墓者三年晨夕泣  
慕不少衰丁內外艱如一轍知縣任士鑑嘗具蔬  
米造廬存問爲署行義年於大府舉孝廉敦促赴  
省驗看固辭不往嘗謂人曰守禮不愆吾黨分內  
事以此得官是假終南爲捷徑也大府愈高其節

三水縣志

卷之十一

人物傳

里

聞於

朝得

旨建坊旌表泰長於文有聲黌序旣食餼人咸以通顯  
期之屢薦不售以明經老義命自安不作抑鬱不  
平之鳴尤爲薦紳先生所推服生平敦實行尙氣  
節和而不流戚黨無愚智咸愛而敬之今奉祀孝  
弟祠

梁守拙利瓊都大岡人以孝義重鄉黨遐邇無間言  
家故不豐而倡義舉周貧乏蒙其施者甚衆里中  
貧不能讀書者尤樂資助以成其才有爭競者聞

守拙聲卽息紛相謂曰此瑣瑣事幸勿令長者知也流風餘韻至今人猶思慕之

陸之隆上驪坑人國學生性孝友年十九丁內艱喪  
葬盡禮越歲丁亥父赴省試旅邸遇病親侍湯藥  
寢食俱忘晨夕焚香拜禱願以身代丁外艱祖母  
猶在隆苦塊抱痛不大著于聲色恐觸老人悲也  
家本小康輕財好義癸巳歲大饑鄰里缺食隆罄  
粟以貸不求其息亦不責償活者甚衆恤孤揜骼  
嘗傾囊橐以爲之讀書至老不倦更庭訓有方長  
子文明領雍正己酉科鄉薦次子及壻俱邑庠生

三水縣志

卷之十一

人物傳

聖

鄧廷玉白泥濬尾人父貫萬有隱德玉與兄廷珍皆  
邑庠生先後食餼性尤孝友事父母弗少怠每飯  
必手自烹飪奉之以飲食之增減爲欣戚侍寢床  
下終夜數起自抑搔至厠踰垢穢之事必躬親之  
寒暑無間母先父歿負土爲墳廬於側哭泣盡禮  
終父喪亦如之以勤讀故體素羸兩銜家恤哀毀  
骨立尋以疾亡年僅三十九歲士論惜之

潛德

李春芳 何應初 陳薦 陳爵

梁逢時仲傳附 歐陽文樂 李岳 梁文綱

李開 梁鏹 周崇仁 梁華藻

李瑞環 黃元標 范念劬 陸殿掄

陳行日 鄧冲璠 陳協陶 歐陽大業

溫觀宸 胡肇嵩 徐廷賢 胡觀儉

董亨 岑際泰 陸振邦 鄧公俊

陳世佐 劉端

李春芳字載陽胥江人因家會城後遂隸番禺幼秀

三水縣志

卷之十一

人物傳

聖

朗不羣稍長知學即能日記千言六經子史罔不

窺探成化十三年新設從化學學憲會選有文行

者往充博士弟子芳以增生入選五載鄉闈不第

閉戶謝客日以著述為事一日與友人論淵明蓋

聞道者也其人不謂然芳曰陶詩云志彼不舍安

此日富又曰千里雖遙孰敢不至儻非有得不知

所志何事而所至何所也聞者以為知言家素貧

二親之喪躬執畚鍤為墳八閱月而後事竣山西

有巨商余允者以千金寄芳而歸至潞州物故芳

屢書名其子恩踰十年而後至至則盡以還之封

識如故人以為難以子義壯貴贈奉直大夫禮部員外郎

何應初字宗啟南海登雲堡人與邑鄰壤田產賦役相錯遂寄籍南岸堡焉初行誼素為鄉里所推少時父以里役勾攝愆期法當笞初聞之亟趨入伏庭下請代令異之謂僚屬曰此孝子也釋之所居瀕河圩岸頽圯呈保遷築署應初圩長眾議溝居民數十家于圩外應初力止之曰吾不忍數十家為魚鼈也全之嘉靖乙未西北潦甚他堡圩陷數百丈各鄉相持數載不得完築民甚苦之時應初

三水縣志

卷之十一

人物傳

四

既以子維栢貴授封矣眾復表請董厥事應初經畫如昔于是兩邑生靈咸藉其庇方文襄公獻夫稱其有禦災捍患之功云應初性坦易與人無相詐虞曠達不問生產惟以課子弟為事維栢按入閩時抗疏被逮寓書慰父應初曰兒職也吾何憾九巖吳憲長聞之曰真滂母也先是閩中藩臬司道會差倉官蘇滿遺金五百為應初津遣資初不動費也及維栢釋歸諭以原物送還項甌東叅政聞之過而詢焉應初出閩庫收示之項曰翁高人也為之立傳而榜其宗約於通衢以式國中應初

雖尊顯雅好朋舊無貴賤大小至則命子相治具  
延接觴詠終日不倦平居天倫聚樂投壺歌詩更  
迭進爵不復知人世豈三公可易者臨卒執子栢  
手曰功名外物父子深恩汝雖不久祿仕然躬養  
我二十餘年甚適以此較彼孰得孰失汝兄弟子  
孫能如你我可矣享年七十有九先勅封浙江道  
御史後加贈都察院左副都御史賜祭一壇季子  
維椅登戊辰進士讀書中秘以吏垣改授春官主  
政

陳薦白泥人以驛丞致仕家居敦尚古禮條立家規  
三水縣志

卷之十一

人物傳

墨

約束宗族本縣旌獎聞於當道巡方扁曰禮義之  
門學憲扁曰爲善之家

陳爵白泥人嘉靖四十一年間經畝里鄧祜等呈舉  
年高有德懇給冠帶本縣通詳司道爵力辭請止  
知縣陶批懇辭獎典不惟見其孝友之可嘉而恬  
退之風亦足以勵世矣此輩不揚何以示勸又行  
該學師生查稱陳爵益加淳勵爲人宅心溫厚制  
行端莊勤儉持家雍和睦族孝友素孚宗戚鄉黨  
稱無間言遂爲具文申詳

梁逢時龍池人字直衢幼而孤事前母兄篤於恭敬

資性聰敏弱冠爲名諸生督學張萊溪深器之以詩教授規範端嚴所成就者多爲科第名人子姓率服推爲族正立宗法一本朱子家禮修族譜法蘇譜爲圖法歐譜爲傳至今世守其模鄉黨有過失皆曰不可使直衢公知之有崔某者其母以竊陳鄰之物撞獲媿而自經崔構勢要將傾陳逢時正言沮之陳感其德以斤金致謝覆他物進家僮福榮覺而白之逢時拂然曰污我亟擲還之其仗義守介類如此循資將貢而卒送葬者遠近數百人爭輿土爲之成墳縉紳士咸惜其不獲試于用

三水縣志

卷之十一

人物傳

吳

云同時爲族副梁仲傳者家貧樂善一介不苟取不伎不求所謂獨行獨寢無媿者也啓迪後進恒諄諄然引古人忠孝廉節以爲法平易近人醇如也知縣朱端明行部聞其賢禮致介賓環觀者大稱得人云

歐陽文樂雄旗人年十四喪父父先爲聘高要劉廷熙女以治疽損背母命退婚文樂曰是背父也乃止劉慮其長有悔心年十六卽促之娶厚以奩田弗受卒爲夫妻終身居宗族間善於勸誨凡鄉黨有不平事必質之遂不成訟時有欺弟愚弱謀奪

其田者文樂責以大義其人悔悟卽還之丙申大饑出粟賑濟并勸鄉之有資者互相周給知縣高瀛臨鄉行賑閱冊獨雄旗無饑人詢得其故大稱賞之

李岳字習之天湖人生平崇儒仗義嘗燕遊道拾得三江河銀者遺金八十兩守而待之及至悉以付還分毫不取銀長跪感泣戴德莫申聞岳雅好花石後乃致二品以餽示不忘也南海大司農李公曾表其墓謂岳清標雅操皜然不滓當有周寶唐斐之應云具載李氏家譜中

梁文綱字公振龍池人貧不事舉子業好古力行天性孝友尤篤於遠宗動循古禮農圃暇無事則高冠寬衣以處少之市之市必衣冠教人效婁公乾唾容容爲福鄉族將千人有訟者恥使綱知也質者一言輒解紛弟文憲以端嚴見憚而綱濟之以淳故人呼爲老道統子鍾秀有豪俠氣精法律得官綱不喜也惟戒以無用智生平一介不肯苟取每自言曰義利分明大丈夫也嘗以財貸人臨終時命取所有負券悉還之惟多積書以遺後人李開字兆啟洲邊人壽百歲生平事親至孝養朝夕

不離臥起待從弟錢穀出入不分爾我爲供賦役  
特建糧田數代祖考皆創有祭業又有大小書田  
之建闔族義田之建籌畫甚周值歲荒出粟廣濟  
鄉鄰賴之有他族女貧而孤爲捐貲助嫁人高其  
義以齒德通學呈舉郡縣詳奉按院給賜冠帶列  
名省垣百歲坊藩司喬定額曰仁壽坊建於縣之  
長安里長男騰任高郵衛經歷次男勝以長子瑞  
麟職封北京忠義衛經歷及序班瑞櫟皆樂善睦  
族稱好禮云

梁鑣西南人少爲諸生力行好古動必於禮於書無

三水縣志

卷之十一

人物傳

哭

所不讀孝友出乎天性平居恂恂至遇事擔當不  
避有姑早孀子甫周歲爲甲宦陳占奪水利孀控  
有司俱畏不敢斷鑣義形于色不避利害負甥控  
直指得申輿論臆之有麻奢陳姓者嬖後子欲逐  
其前子鑣至家以理動之父心悔悟遂相愛如初  
凡鄉族之貧不能娶及無以塋者皆隨財力助之  
壽八十二卒

周崇仁黃岡里人事母孝謹終九旬如一日爲邑庠  
生窮經講學每揭倫理大義誘迪後進成就者多  
所得束金輒以贈卹孤寡萬歷丙申歲斗米貳錢



與弟崇智出粟米賑饑不遺餘財讓書田爲族義田以豫周急貧者以剛正範族族人服之請諸縣命爲族正修族譜輯家訓俾子孫世守準古而裁量力而行至今教行於後知縣高其昌命刊家訓祠中而爲之序

梁華藻字文宇爲鄉約正生平自律不苟凡遇父母諱日皆預齋以奠終身哀思坦懷樂施歲荒每粥饑人值潦漲沿江多溺骸藻親執鋤畚收埋七十餘所尤篤敬文學士汲汲勸人爲善督行鄉約不倦每承邑檄平族里之訟有致饋求庇者叱却之

三水縣志

卷之十一

人物傳

九

爲約正最久知縣陳素養每召見優禮命坐雅好賦詩築南園一區朝夕扶筇逍遙其間卒年八十有九

李瑞環字侯輯天湖人食餼邑庠天性孝謹侍父臥病夙夜不解衣帶生平未嘗私放一錢嘗焚先人債券數十紙示不取濟貧卹孤則唯致無吝通學再舉德行爲族正四十餘年族人皆服其範而懷其德每受閭里質平因以無訟者多應天啟元年歲貢淡於仕宦日笈吟山房以文籍自娛終身黃元標下黃山人食餼邑庠崇實行勤學問素爲同

輩推許兩特獎於學憲崇正乙巳年奉旨擇有學行者明倫堂講忠孝義利四字知縣蔣獻奇以元標薦充辛未歲循資正貢未見用而卒

范念劬三江人幼失怙恃終身肥甘不入口舉動皆循古禮鄉鄰多所感化知縣韓紹忠造廬見之獎曰潛德維風生平篤學閉戶揣摩經史兵刑律歷俱通積書遺後誦讀弗替人謂令德食報云

陸殿掄號金卜城內人庠生崇正癸未年重修學宮開文明門建文昌閣築青雲路不憚苦躬親督理後被仇口陷身通邑含冤比之志士仁人亦不媿焉

三水縣志

卷之十一

人物傳

五

焉

陳行日正直剛方不畏強暴久爲紳士推重生二子五孫長子履豐任永淳典史次孫進德邑庠五孫大猷任上林城守守備知縣蘇察其善行教誨有方復旌獎曰耆年碩德壽八十四而卒

鄧仲璠南岸人品行忠直鄉族推爲鄉正康熙癸亥年知縣王旌獎錫扁曰一鄉善士

陳協陶白泥人素行端莊鄉族推爲鄉正康熙癸亥年知縣王旌獎善行扁曰清時耆碩仍發告示刑杖勸化鄉族悅服

歐陽大業雄旗人邑庠生閉戶潛修足不履公庭邑侯重之延修邑學宮并邑誌著四書翼註四卷溫觀宸西南人邑庠生居家孝友訓子弟先行而後文鄉間有爭者片言解之

胡肇嵩三江人少爲諸生好學力行賦性狷介動必以禮士林推重康熙丁卯秋闈房考德慶州謝蘭英首薦議入彀者數日因二場錯字名落孫山後竟以食餼終身

徐廷賢白泥廟岡人前明萬厯間任江南歙縣縣丞署縣事以疾歸家居力行善事嘗于村前樹下拾

遺金趺坐以俟次日凌晨乃攜金樹下待之適尋金者至詢其人高要金利鄉黃蘊純也問遺金幾何曰三百兩驗其所稱襍裏封識悉符合卽舉原金畀之黃堅請畱其半賢笑曰余貪爾金不坐此樹下兩日矣堅卻之黃感不去心徧爲播揚高要紳士重其義爲呈請兩邑聯銜旌之壽九十三而終舊志闕傳因採訪耆壽見與胡觀儉事適相類亟補志之觀儉字節堯三江人家貧嗜學手一卷芻牧時亦弗釋也有先達講學於鄉儉負屏竊聽至忘午食人共嘆異之嘗牧於烟岡得道旁金陰

物色其人還之介介之搯出之貧士視廷賢尤爲其難矣合而傳之以爲廉讓者勸

董亨字裔顯大坳山人韶州府教授芳之孫庠生長發之子也少穎異出應童子試冠其曹入邑庠性醇謹內敦天顯外篤友誼重然諾而輕于財嘗偕邑明經鄧宇讀書紫霞寺中邑進士胡建偉贈以詩有直追漢代陳三策不負雲臺第一家之句其心賞如此

岑際泰號春堂蔣岸人邑庠生淹通經史能文章試輒前列尤精易數自謂非科名中人故屢躡場屋

三水縣志

卷之十一

人物傳

五

意不少介遭父母喪苦塊三年每薦食哀徹里巷嘗勸人究心朱子格言爲自治之學遊其門者令先讀孝經小學自始迄終解晰微至平居善言善行鄉黨法之屈易簣期預戒家治具畢整衣冠而逝

陸振邦號如山清塘人例授登仕郎性和厚家庭雍睦有平原兄弟風子弟有篤於學者貧則厚資之不令廢業成就甚多乾隆四十六年院司牒行舉鄉保正衆聯請於縣以振充其選資性誠懇無所偏倚攻保悉當宵小斂蹟鄉閭賴安年八十四以

壽終孫龍光中嘉慶庚申 恩科武舉

鄧公俊字才遇上灶人秉正不阿聞有以橫逆于鄉曲者眦輒裂而一室之內事親敬長則恂恂如不及祖遺蒸嘗田若干畝界址爲人所侵俊固知之欲出理懼涉訟貽父母憂隱忍不發晚年卒以清理祖嘗爲讐者所害戚黨咸不平執其讐鳴之官獄成瘐死俊後日以蕃衍嘉慶癸酉長孫光岳舉於鄉詢其讐家已無遺類矣

陳世佐白泥人守道自足有隱君子風少孤孝母母持家嚴肅不假詞色一日庶母何偶忤母意譙讓之忿而求去佐時九齡牽衣泣止之不可親爲負橐至橋復請還曰母不還兒無顏獨歸矣欲赴水死何感動遂畱有一姊適鄧貧而孀佐爲撫其孤得成立家故中人產好施弗倦孳孳爲善尤喜誘掖後進日以曾氏三省自箴因號省堂邑令耳其賢會舉鄉正衆卽以佐應之里有無賴某肆橫咸欲聞諸官佐察其人非怙過不悛者且聞其單傳已三世矣一綫之祧罪不應絕欲委曲以全之倡言曰某無行宜繩以法但非白其狀官不爲理誰工爲牒者衆請先行而具牒佐執曰非成牒不行

眾相顧愕然事遂寢其人聞之卒改行焉乾隆庚子舉鄉飲賓晚年學益進事物朕兆若可燭照偶感微疾辭勿藥屬子壻李某作祭文覽畢沐浴正衾而逝年九十有七著有北窓詩草存家謝太史蘭生爲之傳子道全邑增生孫景唐壬子科鄉薦歷任福建連城長泰漳平等縣知縣

劉端字全政邑庠生河州岡人生平好積德陰行善事有友李遠出舌耕以赴歲考不及入規避詿悞端助貲隨柵補考得附三等末時李年已五旬乏嗣端又爲捐囊買妾果生一子髫齡入泮其族人

某貧而無子端贍生殯死屬子孫歲時祭墓弗衰其全名廣嗣軫老恤貧類如此孫邁祖領乾隆庚辰恩科鄉薦曾元孫列膠庠食廩餼者繩繩不絕人以爲積德獲報云

隱逸

梁道光 陸卓 陸衍 陳遵

鄧丕 梁永濟 陳治策 劉原誨

何天衢

梁道光西南人中咸淳丁卯榜首性喜恬澹不以富貴爲意或勸使出仕嘆曰君子以藏寶自完吾惟俟時何相迫耶遂築室于書院坑絕跡城市屏謝世事惟日以讀書自娛今書院基址猶存

陸卓鎮南人充肇慶府廩生應貢例得水脚坊價卓以不願就官詣有司辭不受歸隱山林吟咏自樂有仲子曰戢應貢亦如其父志云

三水縣志

卷之十一

人物傳

五

陸衍清塘人宣之子性敏博學爲高要庠生學道張考錄優等應補廩餼時衍友劉溥家貧母老考居其次衍以廩讓之督學署申狀曰此生立志遠大篤于友道雖古人以柳易播亦不過此尋復補廩應貢卽歸養親浩然自適

陳遵字從周號耕隱白泥人年七十歲端郡守延請鄉紳陸宣正賓宣以讓遵因爲像贊曰太邱之裔葛天之民爲鄉善士爲郡嘉賓山林者碩無黍深衣幅巾及卒宣輓以詩云江風吹雨濕寒雲訃到

山居不忍聞樂善自宜久生世彼蒼何不少畱君  
片時枕上邯鄲夢五十年前雲水身屈指布衣韋  
帶士如君今有幾何人

鄧丕清塘人號冷爐家素貧教讀爲業而胸懷灑落  
長於吟咏不知人世有貧富相也嫻習岐黃之術  
活人甚衆子俊旣魁賢書丕屨衣疏食淡如也老  
年善治氣養生常笑傲林下焉

梁永濟字素齋龍池人初問學於同邑劉郡丞禹龍  
期以國器數奇連丁內外艱遂絕意舉子業讀書  
吟咏自樂有女弟適南海陳者爲戶糧所累罄產

三水縣志

卷之十一

人物傳

七

助償之家屢空而胸中灑落自爲堂聯曰無皇皇  
于富貴安易以俟命不戚戚乎貧賤循理而樂天  
雅嗜石室風月常登倚而高歌晚年有秘授竒方  
以濟人多所存活而不以市德也詳見區大參墓  
銘中

陳治策號丹泉白泥人生而穎悟七歲能文諸父命  
聯曰雀啄荔枝紅映嘴卽應聲云馬行芳草綠遮  
蹄生平喜讀古書好吟咏不爲時文以干仕進知  
縣朱端明行部造訪贈以詩云聞說丹泉好未能  
來一觀新詩堪對咏古操可時彈清映月星朗咏



如冰雪寒此心能共結久樂可忘餐

劉原誨鎮南人讀書不營仕進握管書事每片言居  
要宿儒皆服清淨出俗亦不爲崖異課耕植外輒  
屏處泉石間罕見面者抵邑不遠而未嘗輕涉官  
津一步遠邇翕然善之風於邑尹召爲鄉人質成  
稱疾不赴就鄉促之乃堅臥不起命吏詢諸寢卒  
無言尹雖訝其固終心賞之與縉紳言未嘗不亟  
稱爲難得云子邑庠生

何天衢字伯槐三江人邑庠生居恒讀書樂道務爲  
身心性命之學終日孜孜常恐不及精醫理兼通

三水縣志

卷之十一

人物傳

五

形家言踵門請者無虛日未嘗一日以他事謝也  
予之錢卒弗受居鄉環堵蕭然吟咏自適不暱人  
而人樂與之親子弟爭師事之每奉其行事爲圭  
臬晚歲絕意仕進而好學彌篤年九十有四以疾  
終於家葬之日鄉鄰來會者數百人

按君子身後定論大則忠孝節義理學文章小  
則一行之善一事之微皆載之史冊以垂不朽  
蓋所以發潛德而闡幽光也然難言之矣文獻  
無徵俎豆埋沒憂闕失也私家傳記紀載失實  
防溢美也懷私者瞻徇無識者附和無以信今

傳後而昭信史也予修肄志一秉至公於舊志  
之外凡所以志其人物者分別門類紀其姓名  
表其芳躅務期覈實以示激勸斷不苟同也知  
我罪我聽之輿論而已

武略

成 諱 陳 綱 麥 福 麥 祥

陳大捷 周茂良 張永成

成諱胥江人少學劍術美丰儀善詞賦爲鄉之豪雄  
宋慶厯間儂賊猖獗所至同惡響應嶺海騷動時  
狄青仗節鉞西討而余靖孫沔參佐兵住鴨埠水  
口諱曰時不可失也徒步往謁以策干青等及語  
古今成敗指關塞虛實厯厯可聽因與定計稱爲  
成郎而不名奏補帳下叅軍抵邕州踰崑崙關所  
向必克智高旣平上賞功累官至廣東安撫使值

三水縣志

卷之十一

人物傳

卒

親老且病解印家居以忠孝訓兒曹誠敬睦黨族  
卒諡忠烈里閉懷其賢廟於胥江之湄歲時致祭  
頗福鄉土迨元運衰左丞東莞何真舟次烏石岡  
欲脇民附己日暮但見人布滿山澤聲振天地中  
有黃袍白馬者目如電光左丞知其爲神竟不敢  
犯乃引兵去民免塗炭乃神力也

陳綱白泥人性宕逸有方畧成化間白上賊首譚二  
率千餘黨流劫遠近多受荼毒官兵禦之失利當  
事者以爲憂榜招能擒賊者重賞剛出應命歸以  
厚賂誘賊譚賊悅甚久之乃築館於黎洲邀譚爲

壽信之偕徒百人至綱大設延宴賊樂而酣飲至醉遂率族里生擒以獻餘黨悉平

麥福豐湖堡人幼至京選入內廷以勤敏敬慎遇事果斷特被武廟眷遇歷御馬監乘馬禁中提督十二團營總提督西教場都知監上南巡界符驗關防畱守京師尋掌司禮監印仍兼督東廠前後屢賜玉帶及飛魚坐蟒服至於公勤端慎銀記及升菴別號之賜尤出殊遇福沉深有武略又讀書好禮於東廠公署後建堂祠

先師出入必瞻拜掌監數年上有以終聖眷下無疵於士大夫之議焉

三水縣志

卷之十一

人物傳

空

麥祥福之弟也嘉靖十六年以冠帶舍人隨寧夏總兵官軍前聽用有斬殺功覈實陞冠帶小旗後於遼東涼州等處屢有斬殺功陞拔錦衣衛左百戶所尋陞正千戶指揮僉事指揮同知嘉靖三十年累加特進榮祿大夫右都督子麥舟廕錦衣衛千戶

陳大捷字肖彭白泥人萬曆初以武生從都督陳璘擊倭救援朝鮮於露石洋昌善島了山口等處焚燬倭船多斬獲功宗伯南石泉公贈詩稱美之尋

又從攻播州楊會及湖貴皮林逆苗皆獲全勝督  
府江前後薦獎有帷幄久藉謀猷戰守咸資之語  
又有乘雪夜而恢復爬城冒鋒鏑而成擒酋首之  
語三十三年授廣州右衛中所百戶世襲仍隨征  
水碇等寨秋援欽州搗破交夷板蒙狼利等巢督  
府孔具奏有兩奏奇勲于異域十收芳譽于叅軍  
之語陞授從化所千戶世襲上書謝事歸老家園  
吟風醉月雅有林下風致

周茂良白下黃岡里人以武生隨都督陳璘征戰朝  
鮮播貴等處有功皆與陳大捷同事於萬曆二十

三水縣志

卷之十一 人物傳

空

三年授南海縣百戶世襲

張永成字思遠張邊人軀貌雄偉有膽畧以軍校得  
官洊擢至潮州城守營都司嘉慶二年調粵兵赴  
兩湖命永成帥以往雷營協勦屢著斬獲功尋調  
赴四川剿教匪每臨敵輒奮勇爲士卒先粵兵素  
矯健從而摧堅靡不克以故得勝仗尤多經畧上  
其勞

賞游擊銜

賜巴圖魯名號戴花翎晉階武義都尉三年隨征達州  
旂山之戰賊勢頗張永成躍馬入陣賊數重圍之

戰愈酣自晨至晡血其刃者無算四顧援絕屢突圍不得出力誦沒於軍事

聞優卹如典易曰澤水困君子以致命遂志永成有焉  
子仁世襲雲騎尉陞雷州營叅將委署順德協副將

按天下競言武畧矣夫家有鶴膝戶有犀渠瞋目而視纓冠而舞非武畧也所謂武畧者有攻取之勇有沉幾之哲得所憑藉焉自能立其功於當代古人云不遇之盤根錯節無別利器此中固大有人在也若執文事以盡人材不猶夫

執毫末以窮馬體哉

鄉飲賓

陸文明

舉人

黃大士

舉人

蘇蔭

欽賜舉人

吳寧邦

庠生孝廉方正

陸瞻宸

歲貢

劉丹

歲貢

梁秋舉

歲貢

周霖

歲貢

鄧宇

歲貢

郭朝綱

歲貢

郭楓

歲貢

謝啟芳

歲貢

鄧江

歲貢

蘇翰仁

廩貢

鄧文佐

清塘人廩貢

嚴時勉

城內人生員壽九十六歲

錢方文

城內東門坊人增生八十五歲本府張區日惠及鄉邦知縣周區日坊表在茲

三水縣志

卷之十一

人物傳

齒

梁嗣樑

西南人生員

林原昌

胥江大塘人生員

范龍光

蔣岸人生員

李渭湄

天湖人生員

鄧文傑

南岸人生員

何耀郎

魯村人生員

潘鶴翔

周灶人武生

劉啟華

河洲岡人武生

李仲元

洲邊人武生

周祖城

黃岡里人增生

范敬敷

蔣岸人生員

劉祚興

南岸人生員

錢宗琳

方文子武生知縣洪區曰古訓是式嘉慶戊寅修志管局

胡廣泌

三江人增生

劉遇龍

河州岡人武生

何昌廷

三江人生員

陸泮林

岡根人生員

周三餘

鳳巢人生員

耆壽

李開

洲邊人壽一百歲

何夢蘭

三江人邑庠鄉

陸昂

清塘人冠帶鄉

李復陽

西南人壽九十

梁仲傳

龍池人冠帶鄉

陸耿

清塘人冠帶鄉

梁鑣

西南人儒官壽

鄧泰

周村人冠帶鄉

劉元化

河洲人壽八十

劉元位

河洲人壽九十

林行存

原縣地白塔岡

葉兆綺

西南人鄉賓壽

陸尙志

上官員人壽九十三歲

郭懋勳

三江人冠帶鄉

梁珩

新生人冠帶鄉

陳預貞

三江人鄉賓壽入

胡大夏

三江人冠帶鄉

三水縣志

卷之十一

人物傳

奎

陸九實

清塘人壽入十五

陸鰲

九水江人冠帶

陸志榮

清塘人冠帶鄉

陸于教

官員人冠帶鄉

胡世績

三江人冠帶鄉

梁華藻

龍池人壽入十

彭貴

冠帶鄉賓壽入

梁觀佑

龍池人冠帶鄉

嚴隱林

白塔村人壽九

鄧藝之

清塘人冠帶鄉

彭銓

冠帶鄉賓壽入

盧仰珍

范湖人冠帶鄉

梁鑄

西南人儒官鄉

王應龍

舊三水鄉人冠

陳儀

白坭人冠帶鄉

鄧成

清塘人冠帶鄉

胡念

三江人冠帶鄉

吳叔英

高豐人冠帶鄉

王應鸞

舊三水鄉人冠

陳六藝

白坭人冠帶鄉



陸積深

清塘人冠帶鄉賓壽八十歲

麥啟謙

董藁人壽七十歲

陳翠林

西南人壽九十歲

何禮和

三江人冠帶鄉賓壽八十歲

陳所貴

白坭人鄉賓壽八十歲事繼母敬謹

胡思

三江人冠帶鄉賓壽八十歲

何思齊

三江人冠帶鄉賓壽八十歲

周象山

黃岡里人壽九十六歲

陸起鳳

官員人鄉賓壽九十歲

鄧尙俊

三江人冠帶鄉賓壽八十歲

冼兆芳

冠帶鄉賓壽九十歲

陳敬軒

西南人壽九十歲積德有聲

何如謀

三江人冠帶鄉賓壽九十歲

彭英幹

彭坑人鄉賓壽九十歲

梁昌祖

利瓊人冠帶庠生壽九十歲

陸應乾

清塘人冠帶鄉賓壽八十歲

周與元

清塘人壽九十六歲紳士製錦稱觴子偉帝眷

陸積本

清塘人冠帶鄉賓壽八十歲

三水縣志

卷之十一

人物傳

奕

嚴茂誠

城內鳳岡人壽八十歲建塔築魁岡基縣主閱之聞區日奉公好義

黃彥傑

縣內白塔岡人督修邑城知縣區日勤敏赴公冠帶鄉賓壽八十歲

鄧奕聯

南岸人生員壽八十五歲閩邑製錦稱觴子夢齡恩貢

鄧世明

白上都上竈人鄉賓壽九十五歲

鄧彥誠

清塘人壽九十歲

鄧彞

清塘人壽九十歲

鄧廷賓

清塘人壽八十歲

鄧孟芳

清塘人壽九十歲

以上舊志

董惠拔

生員大坳山人順治癸巳春縣委督修學宮壽八十四歲知縣程扁日文行兼優紳

土製錦稱觴

黃雲蛟

生員南岸人

李國祉

生員壽八十二歲

范日舒

生員三江人修學有功

梁質菴

鄧坑人醇厚謙和壽九十歲

朱偉清

小逕人壽一百零二歲知縣鄭扁日人瑞又給頂帶以榮之

汪大鰲

城內人壽九十四歲

陸任隆

胥江人壽九十歲

鄧善持

白坭人壽九十六歲子洪錫歲貢

陸日廣

清塘人邑庠生壽八十八歲

以上十人俱行優經前後知縣旌獎者舊志

李孔書

天湖人壽一百零六歲 恩賜八品

李傑

天湖人壽一百零四歲 恩賜八品

黎邦連

埔心人壽一百零三歲 恩賜八品和睦宗族排難解紛

三水縣志

卷之十一

人物傳

七

李聖修

天湖人壽一百零二歲知縣章匾日能靜斯壽

李朝京

塘夏人壽一百零二歲乾隆己酉建坊旌表

劉洪德

漢塘人鄉飲賓壽一百歲乾隆甲子 恩賜八品建百歲坊

龍現輝

田圃人

陸信展

岡根人

陸廣漢

岡根人

以上壽九十九歲

鄧時中

雲塘人

陳瑞昌

大州人 以上九十八歲

張高南

藁頭人

岑惟臬

蔣岸人

蔣光天

蔣岸人

王澤漢

黃木灣人

黃可達

旺子岡人

何昭進

望岡人

麥文簡

文州人

李浩然

蔣岸人 以上九十七歲

林科 岡頭人

陸耀廷 上官員人

歐陽奮揚 雄旂人

鄧可觀 莘田人

李燕章 大壩山人

鄧士珍 清塘人

鄧仰聖 亨堂人

梁萬成 基塘人

李俊魁 南村人

郭秀天 三江人

陸衍岐 上官員人

胡新勝 三江人

陳朝爵 白坭廟岡人

以上九十六歲

杜慧秀 周村人

杜朝幹 周村人

鄧瑤 清塘人

湯秀峰 南岸人

鄧允高 上灶人

徐飛庸 西南人

三水縣志

卷之十一

人物傳

突

陳鼎璧 西南人

范 倂 蔣岸人

關元俊 沙墜人

陸高捷 清塘人

鄧紹蕃 中灶人

蘇景辰 城內東門坊人

陸雲從 岡根人

以上壽九十五歲

林長裕 岡頭人

鄧廣立 清塘人

杜宗榮 周村人生員

霍祖堅 董藁人

陸國尙 九水江人

陳英俊 小塘岡人

容肇舉 西南人

陳挺彬 西南人

李高鵬 魁岡人

董鍾陽 大壩山人

何昌遠 伏護人監生

何里仁 田園人

何天衢 三江人生員 有傳

陸賁園 上官員人

禰浩恩 大山人

鄧鵬霄 上灶人 以上九十四歲

陸仁聲 岡根人

陸敬 清塘人

鄧誠可 清塘人

林尙英 大塘人

鄧悅 文山人

梁惠德 南村人

蘇恂石 石牛岡人

陸延癸 清塘人

錢貫英 下級羅人

劉宇華 松岡人

徐朝德 廟岡人監生

徐彥章 廟岡人監生

鄧浩生 大滯人

陳世佐 白坭人有傳

梁秦臨 西南人

何聯初 伏護人

三水縣志

卷之十一

人物傳

完

鄧建邦 三江人

潘行政 祿步人

林昌五 胥江人

林榮宗 利瓊人

李枝秀 蔣岸人

林大杞 大塘人

張仕璉 艮坑人

李現魁 灶岡人

錢梧尙 城內東門坊人 生員

陸遠經 潮灣人

李連富 沙頭人

張汝琮 艮坑人

陸文槐 岡根人

韓汝龍 石頭岡人

黃仁典 獅嶺人

劉昇鵬 劉邊人鄉飲賓

何慎齋 驛岡人

董時佐 大坳山人

鄧石泉 文山人

以上壽九十三歲

李弼英 南村人

潘文峯 沙頭人

李元佳 灶岡人

陸冠茂 金利人

明占三 西南人現年九十二歲四代同堂知縣王區曰碩德可風那制軍區曰型方善俗

鄧廻先 金利人

林上喬 岡頭人

蘇鵬九 蓬村人生員

陸名秀 大棗人

杜恩榮 周村人

鄧允啟 清塘人

鄧夢曜 清塘人

鄧廣興 承棗人

杜呈光 周村人

鄧廣志 清塘人

謝聲舉 城內人

陳禮桂 驪洲人

鄧朝偉 職員大溲人舉人鄧雲龍之祖積德昌後

三水縣志

卷之十一

人物傳

李

鄧懷遠 承棗人

陳仲方 西南人

董時耀 大塲山人

鄧紹詒 董棗人內閣供事

陳啟寬 西南人

岑可孟 蔣岸人

林獻璧 大塘人

鄧萬長 亨堂人

唐福遠 白沙人

何言大 新村人

張紹琮 良坑人

胡上榮 三江人

何千 赤岡頭人

張興富 華閘村人

何孔宏 赤岡頭人

周國翰 黃岡里人

陸用九 瑞鳳人

以上壽九十二歲

鄧蟾長 清塘人

周尙文 文山人

鄧官相 上灶人

梁洪熙 利瓊人

梁景北 利瓊人

鄧廣善 清塘人

湯式菴 南岸人

陸巒高 蔡坑人

陸恩選 竹山人

吳華典 董東人

劉進忠 龍州人

錢懋忠 城內東門坊人

陳超大 職員白坭驪洲人花燭重逢

皇恩疊錫

郭冕 莘村人生員

陸國聘 金竹人

陸潤泰 竹山人

李桂開 竹州人

陳衍瑞 白坑驪洲人

何洪滿 田圃人

張聘簡 良坑人

何林 三江人

三水縣志 卷之十一 人物傳

三

何魁選 赤岡頭人

鄧志仁 大滘人

成起士 栢木棚人

以上壽九十一歲

陸仰 蔡坑人鄉飲賓

梁祿標 利瓊人

鄧蘭長 伏護人

陸福國 蔡坑人

徐志恭 廟岡人

董喬遷 大棚山人

李貴德 木棉人

胡憲典 三江人

葉如蘭 大山塘人性孝友工詩賦有隱君子風

胡連開 三江人

鄧顯宗 灶頭人

張達顯 張邊人

鄧上琦 大滘人

鄧裕經 南岸人

梁志顯 基塘人

胡茂士 三江人 生員

錢能遠 城內人

梁啟祥 瑞鳳人

陸如容 上官員 人生員

禰權珏 洲頭人

李汝懷 竹洲人

李用周 竹洲人

陳健昌 白坭驪洲人 職員

鄧昭譽 金利人

以上壽九十歲

按洪範五福以壽為先凡人登耆壽謂之人瑞

夫同受天地之氣以生而享年獨永果何以致

此乎大都積德行善安土敦仁者流也

國家久道化成人多壽考肆民淳茂野有古風博

採而備志之何異聞華封之祝聆康衢之謠也

三水縣志

卷之十一 人物傳

三

哉